



ILLUSTRISSIMO VIRO
 SENATORIQUE AMPLISSIMO
 D. D. ANTONIO-LUDOVICO
 S E G U I E R,

IN SUPREMO SENATU PARISIENSI REGIS PATRONO,
 Uni è XL Academiæ Gallicæ.

SENATOR AMPLISSIME,

*T*UA est civium omnium causa. Quam mihi agendam sumo,
 eorum apprimè valetudinem spectat, quâ nihil illis pretiosius.
 Ea momenti profectò non levis, te auspiciem, te Mæcenatem
 A

invocat , civium amicum , patronum , patrem. Non genio
dedicantium ductus , hîc projiciam ampullas laudum. Te
Majoresquè tuos celebrare audeat Apollo. Patriæ fidelis echo
referat , quid vobis Gallica Minerva , quid Forensia lilia
debèant. Novi ego quid valeant humeri , quid ferre recusent.
Sât mihi si primitium hoc obsequiî ergâ te mei monumentum
eâ serenâ fronte , eo benigno receperis animo , quo tibi om-
nium animos captas. Stabit apud me gratia facti dùm vivam ,
& quotiès & ubicumquè licebit , me profiteri , me præstare
gloriabor.

SENATOR AMPLISSIME,

Humillimum & obsequiosissimum
servum tuum BELANGER.
D. M. R. & S. F. M. P. Bacc



QUÆSTIO MEDICA.

CARDINALITIIS DISPUTATIONIBUS

*manè discutienda in Scholis Medicorum, die Jovis
quintâ mensis Martii, an. Domini M. DCC. LXVII.*

M. CLAUDIO-FRANCISCO GRANDCLAS,

Equite, Stanislaï I. Poloniarum Regis, olim Consiliario
Medico, & Regiorum Exercituum à Consiliis Medicis,
necnon Chirurgiæ Professore, Doctore Medico, Præside.

An aliæ à sequanicis aquæ, Parisiensibus ad potum desiderandæ?

I.



INTER fluida hominis vitæ necessaria,
aër primas, aqua secundas tenet. Alter-
utrius desit salubritas, corporis valetudo
deficit. Quanti igitur purum spirare aërem,
tanti puram in victuales usus aquam adop-
tare, nostrâ omnium interest. Ea potus est
noster omnium frequentissimus, dicere au-
sim, saluberrimus. Natura parens, quàm
provida tam benigna suorum operum conservatrix, illius

A ij

ubiquè, parca scèpè licèt manu nobis adminiculum præstat. Si amnem aut rivum aut fontem alicubi recusaverit; vel pluviâ supplet aut subterraneis aquarum venis. Non alium hominibus ipsa decrevit potum.

Antequàm fermentatos malè feriat, palatoquè malè indulgens homo, liquores adinvenerit; aquâ merâ sanus restinguebat sitim, pretioso Naturæ contentus dono.

At quondàm primis (ætas erat aurea) sæclis.

Sobria securam proluuit unda sitim.

Vitis erat nullos hoc tempore passa dolores,

Nulla recurvatæ vulnera falcis erant ? Saut.

Invento munere Bacchi,

Temperat annosum sœtria Lympha merum. Tibull.

Nàm vis est in aquâ calido contraria vino. Ovid.

Element.
Chémie de ar-
tis théoriâ,
pag. 325.

Aqua non solum potio nostra est naturalis & communior, aut facilitiarum aliarum basis, aliarum lenimen. Illam Bœrhavius, nec immeritò, vocat *instrumentum vitæ*. Vita, inquit, nulla, nisi ope aquæ, hæc humorum nostrorum pars blandissima, fluidissima, tenuissima, &c. ipsa sanitas, quæ summa vitæ perfectio, nutritio, corporis incrementum, aquæ magis quàm aliis rebus debentur, nec datur in totâ rerum Naturâ invenire ullum liquorem qui deficientis aquæ absentiam supplere queat. Illius vehiculo carere nevitquàm potest nutritio. Nostra ferè omnia alimenta subit tam solida quam fluida, eâ farina diluitur ad depensandum panem & ad alia dulciarii etiàm pistoris opera, eâ carnes, olera & nunc scèpè quidè incoquantur pisces, tandem primas agit in singulis ferè pulmentis, jusculis & esculentorum condimentis quibus ars culinaria nostras variare nimium studet dapes. Si quid in se contineat malefici, eum cibus & potu in viscera canalesquè corporis traducit, ibiquè varia parit incommoda, quæ ad alias scèpè non sine damno referuntur causas. Indè patet, quanti sit momenti privato cuilibet aquam ad usus proprios eligere, omnis, quantum datur, expertem vitii, quanti magistratum referat nosse, medicorum assignare, aquam civibus potandam, quanti, singulatim Parisiensem, scire nùm Sequana potum illis salubrem præstet, nùm aliæ à sequanicis aquæ desiderandæ & adoptandæ ?

ASSIGNARE aquam melioris notæ, hoc opus, hic labor est. *Vitis siue nemo nascitur, optimus ille est qui minimis argetur.* (Hor.) De aquis ita se res habet: ea purior est, quæ viciata minùs, quæ minimam admittit partium heterogenearum copiam. Sic est à naturâ. Aquæ quotquot sunt, in intimis terræ medullis originem sumunt, indolis indè principii sui naturalis singulæ fiunt participes. At in tantâ principiorum varietate, quænam innocua, quænam aquæ aliis sint preferendæ, quæratur à me forsitàn. Licèt ea quæstio limites mihi à me impositos transcendere videatur, tamèn ad propositi cardinem redit. Huic ut faciam satis, dinumerandæ incumbunt variæ aquarum dulcium species, earumque assignandæ speciatim dotes (1).

Aquarum in duas classes divisionem Medicis omnibus & Chymicis placitam, suggerunt loca singularum natalitia. Pluvialem dant & nivalem nubes, putealem & fontanam telluris viscera suppeditant, proindè fluvialem quam cum aquis stagnantibus offert terræ superficies. Ex illâ divisione sequitur nullam existere aquam merè elementariam, simplicem & homogeneam & quæ distillata aliquantulam non deponat, saltèm terrosam faciem.

Aqua pluvialis omnium purissima à nonnullis decantatur, ut potè vaporazione quasi verâ distillatione in auras elata; at siue particulas quibus antè exhalationem onerabatur, volatiles exhalatione factas secùm referat stillatitia, siue varias admiserit abripueritque secùm substantias hinc illinc in aëre disseminatas, eam non esse ab omni alieno principio liberam Chymici demonstrant. Idcirco Boerrhavius (a) pluviam vocat *atmosphæræ lixivium, in quo colliguntur omnes corpusculorum spe-*

(a) Elementa
chemiæ de ar-
tis theoriâ,
tom. I. p. 318.

(1) Abs re foret aquam marinam vel levitèr hîc attingere cujus tamèn edulcoratio nupèr adinventa, pretiosum offert navigantibus aquandis perfugium novumque splendorem addit inventori suo D. POISSONNIER, hujusce Facultatis Doctori celeberrimo, Regis in Sacro consistorio Consiliario, Regiæ Scient. Acad. Paris. &c. Socio, &c. &c.

cies quæ in aëre oberrant. Unde sales, spiritus, olea, saponēs, terræ, metalla ipsa in eo quandoquē adesse possunt, ratione habitæ excitantis causæ, diversitatis solis & tempestatis. Idem autor in aquâ pluviali detexit fecunda algæ fluvialis, plurimorumquē muscorum seminula, animalcula, &c. D. *Morgraa* (b) in 36 aquæ pluvix unciiis, experimento chymico, reperit centum & ultra grana terræ subflavæ calcariam referentis, sal nitro simillimum & crystalla aliquot cubica à sale comuni nullatenus differentia.

Licet experientia pluvialem aquam intèr & nivalem assequam stabilierit & demonstrarit analogiam, attamen cùm nives priusquam liquefiant, varias in tectis & areis quas diu regunt, patiantur alterationes, cùmquē monticolæ diro necessitatis telo redacti ad nivalis potius angustias, plurimis obnoxii sint morbis, prudenter egerit opinor, qui ad tuendam aquæ pluvix in cisternis asservandæ, quanta est, puritatem, nivalem exclusit, ut & pluvialem ipsam procellosis turbinibus genitam. Sulphureis enim gravida principiis, fetidum sæpè odorem exhalat, imò refertur hujus generis pluviam (c) vestibis exceptam effecisse ut 24 horarum spatio tota scaterent vermibus. D. *Grosse* (d) in eadem aquâ apud Passiacos collectâ anno 1724 dissoluto sale tartari, tartarum eduxit chalchanto respersum. Eadem in experimento à D. *Hellot* an. 1735 instituto, calcis oleum præcipitavit, quasi spiritus vitrioli debilitatus.

Aqua fontana prò originis varietate, varia est. Dædaleæ quas pererrat telluris venæ innumeris abundant substantiis, quibus dissolutis imprægnatur. Saxa duriora, silices, argilla sincera, simpliciore ac puriore aquam indicant. Ea suspensa est quæ lapides aut crustas terræ calcarias lambit. Vitriatur acido vitriolico, quod continent, quodque transmissum, in eâ reperitur formâ selenites indutum.

A fontana putealis origine non differt, utriusque indoles à terrenarum venarum dotibus pendet. Paucos reperire est puteos è quibus aqua sanè potabilis hauriatur. Maxima pars, Parisiis singulatim, aquam suppeditant selenitis calcariisque particulis gravidam. Nec mirum, illa fert secum suæ per terras calcarias peregrinationis ac in iisdem restagnationis

(b) Acta Acad.
Berol. ann.
1752.

(c) Transf. Brit.
pag 652. n^o.
127.

(d) Act. Reg.
Sc. Acad. Parif.
an. 1737.

vitium; fert secum quod admisit è circumjacentibus undique latrinis & cloacis exsudans lixivium, eò abundantius eò pejus & foedius quò urbs populosior. Quid loquar de puteis in cretâ perfossis? Remenses dicant, tristemque depingant quâ ingemiscebant sortem, antequàm Vidulam (1) salubrem potarent.

Silencio prætermittam stagnantes aquas quarum naturam sat produnt illarum odor & sapor, tum animalcula tum mille specierum corpuscula aut illis supernatantia, aut in illis vegetantia, sæpè putrescentia.

(1) Vide Thesim *an Vidula salubris* Remis progignatam à D. NININ Remensis Facultatis in majore ordinariâ Doctore Medico, salubris Consilii Regii Socio, &c. an. 1748 eo tempore quo digna civis benefici D. Godinot (a) aquæ vidulæ ad fontes publicos Remis erigendos elevarentur, inventore & operis duce R. P. FERY tunc apud Remos Matheos Academico Professore.

(a) Dict. Encyclop. sub. voc. *épargne*, p. 749.

I I I.

TANDÈM argumenti nostri caput attigimus, fluvialem aquam scilicet; illius natura pendet 1°. à principiis quibus in telluris gremio se involverunt fontes singuli quorum aggregatio fluvium constituit. 2°. A multiplici substantiâ solubili quam ex alveo & ripis dissolvendam abripit. 3°. A piscibus & plantis quas gignit & alit. 4°. Denique à sordibus exteris quas admittit.

Aqua variorum fontium quibus fluvius constat, sub Dio, libero cursu exercita, vento fluctuatim agitata, faciliè depōnit quidquid peregrini è terræ visceribus asportarat; non aliud imminet periculum nisi ab amnis imo vel lateribus abradat nocivas partes, si lapides interfluat calcarios aut cuprui naturæ solubiles. At pura est nec ulla purior, si canalem habeat sabulosum aut siliceum, si nec lento cursu nequè nimio feratur impetu, si pisces eâ geniti sint exquisiti, nec numerosiores, si nullas, saltèm pro volumine paucas, admittat sordes, nequè producat insalubres plantas quales hyppurim & conservam quæ juxta observationem D. de Jussieu (b) ann. 1731 in alveo fluvii frequentes, aquam illius morbificam reddunt.

(b) *Act. Reg. Sc. Acad. Paris* ann. 1733.

At quibus certioribus indicîis salubrior dignoscitur? à Celso tibi responsum habeas. Ea salubrior est quæ *minimè gravis*; non ea tamen, attende, quam libra aut areometrum, sed quam stomachus leviozem senserit. Cavè enim nè trutinam hâc in re tibi iudicem velis; te non ipsa, tu te ipse falleres. Partes quædam heterogeneæ aquam subeunt, quæ *vel ipsâ sunt leviores aquâ* (b), vel in eâ plura offerunt bullis aëreis involucria. Aër autem se habet ad aquam ut 1 ad 800 (c) aut 850 (e), undè sæpè sit ut ad libram, sub pari volumine, levior illa videatur quæ plûs tamèn alienis partibus scatet & quam stomachus effectû graviorem experitur.

Ea tibi sit igitur potus, quæ, illo iudice, levior, quæ omnis coloris, saporis ac odoris expers & limpida, succulentos pisces alit, quâ sapo facilè dissolvitur, olera promptè coquantur & tenescunt, tandèm quæ chymicis experimentis subiecta, nihil dat. malignantis residui.

I V.

(a) Papius
Massonus in
descrip. sum.
Galliz.

INQUIRENDUM nunc utrûm has Sequana sibi vindicet dotes, Res palàm fiet: Sequana (a) in Burgundiâ oritur fons exiguus, qui sibi iunctis undecim amnibus aut rivis paulatim crescit eundo, usquè dùm Yonam sibi junxerit. Jam inde flumen factum admittit Lupam, Vosiam, Exonam, Orgiam, Matronam & Bibaram tandèm. Ex omnibus his confluentibus, nullus est qui originis & alvei sui naturâ non optimâ sit notæ. Bibara tamèn quæ lanis colore inficiendis est aptissima, non iridèm aliis plenè dotibus gaudet, at quasi stilla est, illius rivuli in Sequanâ fluvio volumen. Matrona sola forsàn suspecta videbitur, quòd apud Campanos orta cretas alluat, at cùm cretacei soli sinibus ad confluentem usquè alveo sincero gaudeat, nullum est dubium quin in longo cursu, alienas, si quas admiserit, particulas deponat atque in Sequanam defœcata, magis ac magis defœcanda deveniat.

Sequana igitur collectio est plurimorum amnium ac rivo-
rum qui sano cœlo terrâque nati, quacumquè transeunt, pisces, mensarum delicias, aquas incolis puras ministrant, qui partim Campaniâ, Burgundiâ partim oriundi, cùm Ba-

cho [illic enim sua regna tenet] certant salubriorem dare Parisiensibus potum. Ea confluentium societas totum constituit quod à partibus naturâ non differt : requidè ipsâ Sequanam potantes inspicere , eos scilicèt qui Curios non Bacchanalia vivunt : oculorum fulgor , labra rosis æmula , genarum nitor , renum ac pedum firmitas sanitate felices indicant. Tinctores , lavatrices , tonsores ipsos interroga : omnes unâ voce artibus suis aptissimam Sequanam laudant , nec ullus est civis qui illam sibi nutricem non gratuletur.

V.

AT *Sequana Franciadum primus regnator aquarum*, reginæ ^{Santæ} urbi allabitur & licèt captus amore loci, fons fieri gaudeat, tamèn ambitiosi in urbem ingressûs luit pœnas & sordes admittit quæ nativas illius dotes saltèm videntur obnubilare. Neù timeas : tanto sub volumine, quid urbis illuvies ? Graviore ima petunt , leviores cito abripiuntur flumine. Dubio fluctuat animus ; artis magistros consule : discas iis aquis etiàm urbem transverfis ibiquè non nihil ab originali puritate degeneratis , nullum tamèn inesse sulphureum aut inflammabile principium , acida aut alkalia libera nulla , ferrugineas , ærosas metallicas aut maleficas quaslibet nullas , sed aliquot tantummodò terrosas partes selenitam referentes , quæ nullis hirsutæ angulis per viscera , tunicas , tubosquè corporis liberum innocuè sibi transitum pandunt.

Fateor equidèm sequanam in urbe nonnihil splendoris suî deperdere , & illius aquam ulterius hauttam , multò puriorem fore , & hanc desiderandam. Forsàn veniet aliquandò tempus quo eo tandèm beneficio donabuntur cives. Magnæ molis equidèm opus. At quid à Populi Patribus ad civium incolumitatem hætenùs intentatum ? Eâ ætate, eâ præsertim in urbe quâ scientiæ certatim & artes florent , quid Mechanicis arduum ? Norunt omnes machinam quæ ignis vi movetur, quæ D. Papino Doctori Medico Marburgensi anno 1698, primævam suam originem debet , quâ nihil hætenùs in technicis ingeniosius excogitatum. Absit à me ut falcem injiciam in alienam messëm. At Mechanici contendunt hujusmodi machinam ,

salvâ navigatione , extrâ urbem, ultrâ Bibaram & nosocomium superius erigi posse , quæ carbonis fossilis igne mota , aquam tum ad civium sanitatem , tum ad urbis munditiam & indè majorem aëris salubritatem, ut puriorem sic abundantiorē indefinenter daret. Quædam scripta ferunt rem fuisse propositam anno 1737 (a) & recentè anno 1765 (b). Nemo non assentiet machinam ultrâ urbem erectam , (quilibet fuerit illius mechanismus & motor , modò rei locoquè scitè accommodata , artificio simplex & solida , debitum aquæ volumen elevarit , modò resarcienda alteram ad effectûs perennitatem sibi subrogandam habuerit , modò tandè nullum attulerit navigationi impedimentum) longè prævalituram machinæ nunc fontes publicos adaquantæ , quæ in urbis umbilico sub ponte perperam sita , diluviis accrescens non sinè periculo coarctat flumen , quæ & plurimis subjacens colluviariis , aquam ut nequè sât largam , nequè perennem , sic nequè sât puram suppeditat.

Vir Academicus ut in Gnomonicis sic in Hydraulicis veratissimus D. *Deparcieux* (c) Yvettam proponit , aquæductu tum aperto tum arcuato septem circitèr leucarum , Parisios advehendam. Herculeum civis optimi laborem laudo , at bonâ illius veniâ , aliquot hîc observationes exponere mihi operæ pretium videtur. Yvetta , quæ Versalias intèr & Rambolietum originem habet & quæ Orgiæ juncta in Sequanam subter Juvissiacum influit , amniculus est plurimis in locis paludosus. Hinc collibus , illinc agris cultis circumdatus , undiquè frequentibus infestatur diluviis. Hinc hyemali pluviisquè temporibus , illius aquæ eò limosiores ac turbulentiore s fiunt , quò minus est earum volumen. Palustri odore nares , palustri sapore palatum afficiunt. His equidem vitiiis adventitiis remedia præponit autor , at quantumvis certa futura sint , constat , Yvettam chymicè tentatam à viris è Facultate Medicâ Parisiensi celeberrimis , sub duabus aquæ suæ libris deposuisse septem grana siccati residui , cujus pars dimidia terra fuit calcaria , altera partim selenites , partim sal glauberianum , sal marinum aliud purum , aliud base terrosam , nec nihil etiâ vegetæ substantiæ. Quo patet Yvettam ; licèt in se nihil indicari malefici , Sequanæ palmam cecidisse. At sup-

(a) Belidor
Arch. hydraul.
tom. 2. p. 234.

(b) Projet par
tr'otiq. sur les
moyens de
fournir à Paris
des eaux sai-
nes.

(c) Mémoire
lu à l'Assem-
blée publique
de l'Académie
Royale des Sc.
13 Novembre
1762.

ponantur dotibus & naturâ pares. *Frustrâ fit per plura, quod fieri potest per pauciora.* Frustrâ quæritur foras quod habetur domi. Sequana igitur ut proximior, ut (saltêm extrâ urbem) purior, ut habitâ ratione voluminis, magis certa, alienis minùs saturata; ut inodora, lenis, mitis & insipida, ut salubris usu longo nota & experta, tandêm, omnibus titulis, videtur anteferenda. Huic assueti Parisienses, beneficam ab incunabilis experti, solitum, quasi lac maternum infantes, illius sempër reclamabunt potum, nequè ignotam sibi què dubiam, notâ, expertâ, sibi à Naturâ benignâ donatâ nutricem præferent. At hæc obiter & quasi per transennam dicta sunt. Jovem enim testor me hîc ab omni parte alienum, nolle quempiam carpere, lædere aut lacescere.

Nec objiciant advenæ, se prioribus Sequanicæ haustibus subitò alvi profluvio corripî. Non fors eadem omnibus. Igitur à peculiari corporis habitu aut ab aliâ quâlibet adventitiâ causâ repetendum quod objicitur. In mali suspicionem non malè veniunt aquaria vasa domestica plerùmque ænea. Licèt enim stamno illiniantur, sub dolosâ stamni lamellulâ tacitum venenum latet, nec immeritò (a), constanda ex his vasibus statua decerneretur servatori civium qui de hoc metallo à cibariis potiorisquè usibus arcendo sanciret legem. Malè igitur eâ de re Sequanam advenæ culpant.

(a) Dict. Encyclopéd. suâ voc. *Cuivre*.

In arenam prodeant fontium patroni & fontanam ad astra tollant, fluvialem deprimant. Non diù certabitur inter nos: Parisini habent ad ortum fontes Bellavillenses, qui ductu subterraneo in urbem deveniunt. Illorum aquas olim potabant cives, sed ad potum meritò repudiata fuerunt, ut potè cruditate suâ stomachis graves. A fontibus publicis exules nunc cloacis, uti par erat, abluendis destinata, vasto recipiuntur lacu, cui sufficiendo supplementum habent machinam duplicem jumentariam juxta pontem à *caulibus* dictum.

Ad septentrionem alios alter aquæ-ductus in urbem adducit fontes à San - Gervasii prato oriundos, at vix quindecim aquæ uncias summatim ministrant, vix què naturâ suâ Bella-villensibus præstant.

Ad austrum *Arculliana* aqua defertur in urbem aquæ-

ductu, quo antiqua, si revivisceret, Roma gloriaretur. Limpida, quâ nulla limpidior, oculos allicit & sitim vel minime sitientibus provocat, at stomacho eâ gravato non arripdet iridem.

Magno de flumine malle

Quam ex hoc fonticulo tantundem sumere... Hor.

(*) Act. Reg.
Sc. Acad. Paris.
an. 1711.

Varios enim (a) admittit sales ac varias calcariae substantiae particulas, quae concrecentes paulatim & in crustam durecentes, aquae viam ita coarctant ut totam obstruerent, nisi post aliquot annos tubus in longitudinem diffusus aperiretur, ac nucleus indè, quasi tubus alter lapideus, educeretur.

Tandem nonnulli jactitent aquam *potu-regiam*: nil Sequanicæ derogabunt. Quam enim tam altè prædicant, à chymicis probata, Sequanæ submisit fascies & peritissimos in arte medicâ viros ipse novi, qui ægris & sanis potandam hanc aquam præscripserant, sed qui astringentiorum experti, in se reduces, sequanicæ usum prompto revocare consilio. His omnibus latè patet Yvettâ citatisque fontibus Sequanam esse naturâ suâ præstantiorem, nequè diutius morabor concludere;

Ergò aliæ à sequanicis aquæ, Parisiensibus ad potum non sunt desiderandæ.

Proponebat Parisiis AMBROSIUS-AUGUSTUS
BELANGER, Parisinus, Doctor Medicus Remensis,
Saluberrimæ Facultatis Medicinæ Parisiensis Baccalaureus,
Theses Auctor. A. R. S. H. 1767.

A SEXTA AD MERIDIEM.

Typis QUILLAU, Univers. & Facult. Med. Parisiensis, Typographi.